

26 May 2025

समे .18:15 Hrs

<><><><><><>

Headlines

प्रधानमंत्री नरेंद्र मोदी होरें आखेआ ऐ जे आपरेशन सिंदूर छड़भू इक फौजी कारवाई गै नेई, सगुआं भारतीयें लोकें दे मूल्यें ते भावनाएं दी इक अभिव्यक्ति ऐ।

प्रधानमंत्री नरेंद्र मोदी होरें अज्ज अपने कार्यकाल दे 11 बरें पूरे करी लैते न।

उपराज्यपाल मनोज सिन्हा होरें आखेआ जे जिसलै विज्ञान, समाज दे ताने-बाने कन्नै हेठली सतह पर जुड़ी जा ते एहदे कन्नै ना छड़ा नमियें काहडें च तेजी औंदी ऐ, सगुआं समाज दे पूरे-पराते जीवन स्तर च बी बेहतरी औंदी ऐ।

खेड्ड मंत्री सतीश शर्मा होरें आखेआ जे मुख्मन्त्री उमर अब्दुल्ला हुंदी अगुवाई च औने आहले दिनें च खेड्ड खेत्तर च महत्वपूर्ण तब्दीलियां दिक्खि जाडन।

ते जम्मू रेलवे डिविजन आसेआ पैहली चैरी कार्गो कोच आहली ट्रेन औंदी 3 जून गी कटड़ा थमां मुम्बई लेई रवाना कीती जाग।

<><><><><><>

PM-Gujrat

प्रधानमंत्री नरेंद्र मोदी होरें आखेआ जे आपरेशन सिंदूर छड़ी सैन्य कारवाई गै नेई ऐ ही, सगुआं भारत दे लोकें दे नैतिक मूल्यें ते भावनाएं दी इक अभिव्यक्ति ऐ।

गुजरात दी दाहोद थाहर इक रैली गी संबोधित करदे होई उनें आखेआ जे अज्ज समें दी मंग ऐ जे मुल्ख दे विकास लेई जो किश बी लोड़चदा ऐ मुल्खे च गै बनाया जा।

प्रधानमंत्री होरें 24 जहार करोड़ रपे दे कई सारे विकास प्रोजैक्टें दा नीहू पत्थर रक्खेआ ते केइएँ दा उद्घाटन कीता। एहदे थवां पैहले प्रधानमंत्री होरें गुजरात च बक्ख-बक्ख विकास परियोजनाएं दा उद्घाटन ते नीहू पत्थर रखने थवां पैहले बडोदरा च इक रोड शो कीता। मगरा प्रधानमंत्री होरें दाहोद च रेलवे दे लोकोमोटिव विनिर्माण संयंत्र दा उद्घाटन कीता।

<><><><><><>

PM-11 Years

प्रधानमंत्री नरेंद्र मोदी होरें अज्ज अपने कार्यकाल दे 11 बरे पूरे करी लैते न। अज्जै दे गे दिन 2014 च भारत दे प्रधानमंत्री दे तौर पर नरेंद्र मोदी होरें संगंध लैती ही। एहू मुख्य दे आधुनिक राजनीतिक इतिहास च इक महत्वपूर्ण मोड़ हा की जे इन्नै भरत च गठबंधन दी राजनीति दे युग गी खत्म कीता ते लोकें भारतीय जनता पार्टी गी साफ, स्पष्ट ते निर्णायक जनादेश दित्ता।

<><><><><><>

LG-Physics Yatra

उपराज्यपाल मनोज सिन्हा होरें उधमपुर थवां फिजिक्स भारत यात्रा गी शुरू करोआया। इस मौके पर अपने संबोधन च उपराज्यपाल होरें पदमश्री कन्नै सम्मानित श्री डॉ. एस. सी वर्मा हुंदी अगुवाई च Indian Association of Physics teachers ते National Anveshika Network of India दे जतन दी सराहना कीती। उपराज्यपाल होरें आखेआ जे जिसले विज्ञान समाज दे ताने-बाने कन्नै हेठली सतह पर जुड़ी जा तां एहदे कन्नै नां छड़ा नमिएं काहडें च तेजी औंदी ऐ, सगुआं समाज दे पूरे-पराते जीवन स्तर च बी बेहरती होंदी ऐ। उनें आखेआ जे पिछले इक दहाके च प्रधानमंत्री नरेंद्र मोदी हुंदी अगुवाई च आत्मनिर्भर भारत आहली सोच च व्यापक बदलाव आया ऐ।

<><><><><><>

Poonch-bhatadurian

भारत ते पाकिस्तान बश्कार बन्ने पर बनी दी तनोतनी करी सामरिक महत्व आहली भाटाधूडियां सुरंग दा निर्माण कम्म जेहड़ा किश चिरै लेई रोकी दित्ता गेआ हा, उसी हून परतियै चालू करी दित्ता गेआ ऐ। पुंछ जिले च पिच्छले दिनें पाकिस्तान आसेआ कीती गेदी भारी गोलाबारी दे चलदे एहतियात दे तौर उपपर इस सुरंग दा कम्म बंद करी दित्ता गेआ हा पर हून दौनें मुख्य बश्कार संघर्ष विराम होने दे चलदे एहदा कम्म फही शुरू होई गेआ ऐ। सीमा सड़क संगठन ते निर्माण कंपनी नै कब्ज़ा रेखा पर बार-बार होआ'रदी पाकिस्तानी गोलाबारी दे मद्देनजर कम्मगारें दी सुरक्षा सरबन्धी चैताएं दा हवाला दिंदे होई इस सुरंग दे कम्म गी रोकी दित्ता हा। उ'आं संघर्ष विराम दे बाद हून इंजीनियर ते कम्मगार, अपने कम्म पर परतोई आए न।

<><><><><><>

Samba-Blood Donate

साम्बा जिले दी रामगढ़ स्थित सरकारी समुदायिक सेहत केंद्र च रक्तदान शिविर दा सरिस्ता कीता गेआ। एहदा आयोजन भारतीय जनता पार्टी दे कार्यकर्ताएं आसेआ कीता गेआ। एहदा उद्घाटन रामगढ़ दे विधायक डॉ. देवेन्द्र कुमार मन्याल होरें ब्लॉक मेडिकल अफसर ते अस्पताल दे होर दुए अफसरें दी मौजूदगी च कीता गेआ। इस मौके पर स्हाड़े जिला संवाददाता कन्नै गल्ल करदे होई डॉ. देवेन्द्र कुमार मन्याल होरें आखेआ।

<><><><><><>

Satish-Sports

खेडु मंत्री समीश शर्मा होरें आखेआ ऐ जे मुखमंत्री उमर अब्दुल्ला हुंदी अगुवाई च औने आले दिनें च खेडु खेत्तर च महत्वपूर्ण तब्दीलियां दिक्खियां जांगन। उनें खेडु दे राएं नोजवानें दे जुड़ाहू गी बढ़ावा देने दी सरकार दी

वचनबद्धता गी उजागर कीता। मंत्री होरें टीम रेड आस्सेआ आयोजत इक कार्यक्रम दे दरान एह गल्ल कीती। कार्यक्रम दा मकसद नोजवानें च नशीले पद्वार्थें दु दुरुप्योग दे खतरें दे बारे च जागरूकता बधाना हा। इस कार्यक्रम च जोश ते उत्साह आली हिस्सेदारी दिक्खी गई। एह पैहल खेडुं जनेही सकरात्मकगतिविधिएं दे राएं युवा पीढ़ी आस्तै सेहतमंद ते नशे शा मुक्त भविष्य दे सनेए गी मजबूत करदी ऐ। इस मौके पर बोलदे होई मंत्री समीश शर्मा होरें आखेआ

<><><><><><>

Cherry-Cargo Train

जम्मू कश्मीर दे उत्पाद जेहडे तोले खराब होई जंदे न, उनेंगी तौले थमां तोले बाह्य भेजने आस्तै अपनी चाल्ली दी ते अपनी किस्मा दी पैहली जम्मू रेलवे डिवीजन नै 3 जून थमां कटरा रेलवे स्टेशन थमां बांद्रा तगर अपना पैहला वीपी इंडेंट यानि समेयान गी भेजने आस्तै इक पूर्ण पार्सल वैन दे आवंटन दा अनुरोध कीता ऐ ते एहदे लेई पंजीकृत कराया ऐ। एह जतन बागवानी मैहकमे ते फल उत्पादक संघें कन्नै व्यापक बचार बमर्श मगरा शुरू कीता गेआ ऐ। एहदे कन्नै उत्पाद गी नुक्सान होने थमां बचाया जाई सकोग। इस जतन राएं रेल दे जरियै चीजां भेजियां जांगन ते 30 घंटे च एह समेयान अपनी तैह थाह तगर पुज्जी जाग।

<><><><><><>

Ramban-Food Safety

खाद्य सुरक्षा मैहकमा रामबन आसेआ खाने-पीने आहली चीजें दी म्यारी ते साफ-सुथरी उपलब्धता यकीनी बनाने लेई लगातार जत्त कीते जा'रदे न। एहदे लेई खाने-पीने आहली चीजें दी गुणवत्ता तय करने आहले मानकें पर चेचा करी ध्यान दित्ता जा'रदा ऐ ते कन्नै गै इंदी बंड बिक्री पर बी तक्क रक्खी जा करदी ऐ। इसै सिलसिले च मैहकमे समें-समें पर खाने-पीने आहली चीजें दे नमूने किट्टे करदा ऐ तां जे उंदी जांच करियै गुणवत्ता गी यकीनी बनाया जाई सकै। एहदे अलावा मैहकमे आसेआ लोकें गी ते खाने-पीने आहली चीजें सरबन्धी हट्टियें आहले जां फी कारोबारियें सब्बनें गी खाद्य सुरक्षा मानकें दी पालमा करने दे महत्वै बारै जानकार बनाया जा'रदा ऐ। इसै सिलसिले च कई जागरूकता शिविर बी लोआए जा'रदे न। इस बारै आकाशवाणी समाचार कन्नै गल्ल करदे होई रामबन थमां खाद्य सुरक्षा अधिकारी बलवीर सिंह होरें आखेआ।

<><><><><><>

National-Yoga Olympiad

योग दे बेहतरीन प्रदर्शनें गी दर्शाने आहला इक प्रतिष्ठित आयोजन- National Yoga Olympiad 2025 दा आयोजन डाइट किशतवाड़ आसेआ कीता गेआ। एह पहलकदमी शिक्षा मंत्रालय दी तरफा NCERT आसेआ कीती गई ऐ जेदा मकसद स्कूलें च योग गी बढ़ावा देना ऐ। किशतवाड़ थमां एम.एल.ए शगुन परिहार होर मुख् परौहने दे तौरा पर इस कार्यक्रम दा उद्घाटन कीता। जिला स्तह पर जित्ते दे 16 विद्यार्थियें हून डिविजनल सतह दी प्रतियोगिता च हिस्सा लैडन जेदे मगरा तमिलनाडू दे कन्याकुमारी च होने आहले राश्ट्रीय सतह दी प्रतियोगिता दा आयोजन कीता जाग।

<><><><><><>

Announcement

आकाशवाणी जम्मू दे क्षेत्रीय समाचार एकांश आसेआ कठुआ जिले लेई अंशकालिक संवाददाता यानि पीटीसी लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 बरें दे बश्कार ऐ ते ओह कठुआ जिले दा रौहने आह्ला ऐ, इस लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 बरें दा तजुर्बा होना लोड़चदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंघत लोड़चदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोड़चदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू पिन कोड 180001 उप्पर 15 जून 2025 थवां पैहले-पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>